



URED ZA REVIZIJU INSTITUCIJA BiH
КАНЦЕЛАРИЈА ЗА РЕВИЗИЈУ ИНСТИТУЦИЈА БИХ
AUDIT OFFICE OF THE INSTITUTIONS OF BOSNIA AND HERZEGOVINA

www.revizija.gov.ba



IZVJEŠTAJ O OBAVLJENOJ FINANSIJSKOJ REVIZIJI

CENTRA ZA INFORMIRANJE I PRIZNAVANJE DOKUMENATA IZ OBLASTI VISOKOG OBRAZOVANJA ZA 2025. GODINU



Sadržaj

I	MIŠLJENJE NEZAVISNOG REVIZORA.....	2
1.	MIŠLJENJE O FINANSIJSKIM IZVJEŠTAJIMA	2
2.	MIŠLJENJE O USKLAĐENOSTI.....	4
II	REZIME PREPORUKA DATIH ZA 2025. GODINU	6
III	IZVJEŠTAJ O OBAVLJENOJ REVIZIJI	6
1.	PREDMET I CILJ REVIZIJE	6
2.	KRITERIJI KORIŠTENI U REVIZIJI	7
3.	METODE I POSTUPCI REVIZIJE	7
4.	OCJENA REALIZACIJE PREPORUKA IZ PRETHODNIH IZVJEŠTAJA	8
5.	NADLEŽNOST, ORGANIZACIJA I RUKOVOĐENJE.....	8
6.	SISTEM INTERNIH KONTROLA	9
7.	FINANSIJSKI IZVJEŠTAJI	10
7.1.	Pregled prihoda i primitaka	10
7.2.	Pregled rashoda i izdataka iz budžeta	10
7.2.1.	Putni troškovi	11
7.2.2.	Novčane donacije	12
7.3.	Bilans stanja	13
8.	ZAPOSŁJAVANJE I STATUS ZAPOSLENIH (ANGAŽOVANIH) OSOBA	13
8.1.	Zapošljavanje na određeno vrijeme	13
8.2.	Povratak s odsustva iz državne službe	14
9.	JAVNE NABAVKE	15
10.	KOMENTARI CENTRA NA NACRT IZVJEŠTAJA	16
PRILOZI		16

I MIŠLJENJE NEZAVISNOG REVIZORA

Mišljenje nezavisnog revizora se daje na osnovu obavljene finansijske revizije koja obuhvata reviziju finansijskih izvještaja i, u vezi s istom, reviziju usklađenosti aktivnosti, finansijskih transakcija i informacija s relevantnim zakonima i drugim propisima.

1. MIŠLJENJE O FINANSIJSKIM IZVJEŠTAJIMA

Mišljenje

Obavili smo reviziju finansijskih izvještaja **Centra za informiranje i priznavanje dokumenata iz oblasti visokog obrazovanja** (u daljem tekstu: Centar) koji obuhvataju: bilans stanja na 31.12.2025. godine, pregled prihoda, primitaka i finansiranja po ekonomskim kategorijama, pregled rashoda po ekonomskim kategorijama, posebne podatke o plaćama i broju zaposlenih, pregled dinamike zapošljavanja, pregled stalnih sredstava u obliku stvari i prava, pregled kapitalnih ulaganja po vrstama i projektima, pregled doznaka iz tekuće rezerve budžeta, te analizu izvršenja budžeta – tekstualni dio, za godinu koja završava na taj dan.

Prema našem mišljenju, finansijski izvještaji Centra prikazuju istinito i fer, u svim značajnim aspektima, finansijsko stanje imovine, obaveza i izvora sredstava na 31.12.2025. godine, te prihode i izvršenje budžeta za godinu koja se završava na navedeni datum, u skladu s primjenjivim okvirom finansijskog izvještavanja.

Osnova za mišljenje

Reviziju smo obavili u skladu sa Zakonom o reviziji institucija Bosne i Hercegovine¹ i Međunarodnim standardima vrhovnih revizionih institucija (ISSAI)². Naše odgovornosti prema ISSAI standardima su detaljnije opisane u odjeljku *Odgovornosti revizora za reviziju finansijskih izvještaja*.

Nezavisni smo od Centra u skladu s etičkim zahtjevima koji su relevantni za našu reviziju prema ISSAI 130 – Etički kodeks i ispunili smo ostale etičke odgovornosti u skladu s tim zahtjevima.

Vjerujemo da su revizioni dokazi koje smo pribavili dovoljni i odgovarajući da osiguraju osnovu za naše mišljenje.

Odgovornosti rukovodstva za finansijske izvještaje

Rukovodstvo Centra je odgovorno za sastavljanje i fer prezentaciju finansijskih izvještaja u skladu s primjenjivim okvirom finansijskog izvještavanja na nivou institucija Bosne i Hercegovine tj. Zakonom o finansiranju institucija BiH, Pravilnikom o finansijskom izvještavanju institucija BiH i Pravilnikom o računovodstvu s računovodstvenim politikama i procedurama za

¹ Službeni glasnik BiH, broj 12/06

² Međunarodni standardi vrhovnih revizionih institucija (ISSAI) dio su Okvira profesionalnih objava Međunarodne organizacije vrhovnih revizionih institucija – IFPP okvira (INTOSAI Framework of Professional Pronouncements), koji čine tri nivoa objava: INTOSAI principi (INTOSAI-P), međunarodni standardi vrhovnih revizionih institucija (ISSAI) i INTOSAI smjernice (GUID).

korisnike budžeta institucija BiH. Ova odgovornost podrazumijeva i kreiranje, primjenu i održavanje internih kontrola koje su relevantne za sastavljanje i prezentaciju finansijskih izvještaja koji ne sadrže značajne pogrešne iskaze uslijed prijevare ili greške, odgovarajuća objelodanjivanja relevantnih informacija u napomenama uz finansijske izvještaje, kao i odabir i primjenu odgovarajućih računovodstvenih politika i računovodstvenih procjena, koje su razumne u datim okolnostima.

Odgovornosti revizora za reviziju finansijskih izvještaja

Naši ciljevi su steći razumno uvjerenje o tome jesu li finansijski izvještaji kao cjelina sačinjeni bez značajnog pogrešnog prikazivanja uslijed prijevare ili greške i izdati izvještaj nezavisnog revizora koji uključuje naše mišljenje. Razumno uvjerenje je visok nivo uvjerenja, ali nije garancija da će revizija obavljena u skladu s Međunarodnim standardima vrhovnih revizionih institucija uvijek otkriti značajno pogrešno prikazivanje kada ono postoji. Pogrešni prikazi mogu nastati uslijed prijevare ili greške i smatraju se značajnim ako se razumno može očekivati da, pojedinačno ili zbirno, utiču na ekonomske odluke korisnika donesene na osnovu tih finansijskih izvještaja.

Kao sastavni dio revizije, u skladu s Međunarodnim standardima vrhovnih revizionih institucija, stvaramo profesionalne procjene i održavamo profesionalni skepticizam tokom revizije. Mi također:

- Prepoznamo i procjenjujemo rizike značajnog pogrešnog prikazivanja finansijskih izvještaja, zbog prijevare ili greške, oblikujemo i obavljamo revizione postupke kao reakciju na te rizike i pribavljamo revizione dokaze koji su dovoljni i primjereni da osiguraju osnovu za naše mišljenje. Rizik neotkrivanja značajnog pogrešnog prikazivanja nastalog uslijed prijevare je veći od rizika nastalog uslijed greške, jer prijevare može uključiti tajne sporazume, krivotvorenje, namjerno izostavljanje, pogrešno prikazivanje ili zaoblazanje internih kontrola.
- Stičemo razumijevanje internih kontrola relevantnih za reviziju kako bismo oblikovali revizione postupke koji su primjereni u datim okolnostima, ali ne i za svrhu izražavanja mišljenja o uspješnosti internih kontrola.
- Ocjenjujemo primjerenost korištenih računovodstvenih politika i razumnost računovodstvenih procjena i povezanih objava koje je stvorilo rukovodstvo.
- Ocjenjujemo cjelokupnu prezentaciju, strukturu i sadržaj finansijskih izvještaja, uključujući i objave, kao i odražavaju li finansijski izvještaji transakcije i događaje na kojima su zasnovani na način kojim se postiže fer prezentacija.

S rukovodstvom komuniciramo u vezi s, između ostalih pitanja, planiranim djelokrugom i vremenskim rasporedom revizije i važnim nalazima revizije, uključujući i one koji se odnose na značajne nedostatke u internim kontrolama koji su otkriveni tokom naše revizije.

2. MIŠLJENJE O USKLAĐENOSTI

Mišljenje

U vezi s revizijom finansijskih izvještaja Centra za 2025. godinu, obavili smo i reviziju usklađenosti aktivnosti, finansijskih transakcija i informacija s relevantnim zakonima i drugim propisima.

Prema našem mišljenju, aktivnosti, finansijske transakcije i informacije Centra za 2025. godinu u skladu su, u svim značajnim aspektima, sa zakonima i drugim propisima koji su definisani kao kriteriji za datu reviziju.

Osnova za mišljenje

Reviziju usklađenosti smo obavili u skladu sa Zakonom o reviziji institucija Bosne i Hercegovine i ISSAI 4000 – Standard za reviziju usklađenosti. Naše odgovornosti prema ovom standardu su detaljnije opisane u odjeljku *Odgovornosti revizora za reviziju usklađenosti*.

Nezavisni smo od Centra u skladu s etičkim zahtjevima koji su relevantni za našu reviziju prema ISSAI 130 – Etički kodeks i ispunili smo ostale etičke odgovornosti u skladu s tim zahtjevima.

Vjerujemo da su revizioni dokazi koje smo pribavili dovoljni i odgovarajući da osiguraju osnovu za naše mišljenje.

Skretanje pažnje³

Ne izražavajući rezervu na mišljenje o usklađenosti, skrećemo pažnju na sljedeće:

- *povratak osobe u državnu službu bez ispunjavanja zakonom propisanih uslova (tačka 8.2. Izvještaja).*

Odgovornosti rukovodstva za usklađenost

Pored odgovornosti za sastavljanje i fer prezentaciju finansijskih izvještaja, rukovodstvo Centra je također odgovorno osigurati da su aktivnosti, finansijske transakcije i informacije u skladu s propisima kojima su regulisane i potvrđuje da je tokom fiskalne godine osiguralo namjensko, svrhovito i zakonito korištenje raspoloživih sredstava za ostvarivanje utvrđenih ciljeva, te ekonomično, efikasno i efektivno funkcionisanje sistema finansijskog upravljanja i kontrole.

Odgovornosti revizora za reviziju usklađenosti

Pored odgovornosti da izrazimo mišljenje o finansijskim izvještajima, naša odgovornost podrazumijeva i izražavanje mišljenja o tome jesu li aktivnosti, finansijske transakcije i informacije, u svim značajnim aspektima, u skladu sa zakonima i drugim propisima kojima su regulisane. Odgovornost revizora uključuje obavljanje procedura, kako bi pribavili revizione

³ Odjeljak kojim revizor skreće pažnju korisnicima izvještaja na pitanja koja su prezentovana ili objelodanjena u informacijama vezanim za predmet revizije, a koja su, prema revizorovoj profesionalnoj prosudbi, jako važna za razumijevanje takvih informacija od strane korisnika izvještaja; u revizionoj praksi ovaj odjeljak se naziva još i 'isticanje pitanja'.



dokaze o tome koriste li se sredstva za odgovarajuće namjene i je li poslovanje Centra, prema definisanim kriterijima, usklađeno s relevantnim zakonima i drugim propisima. Procedure podrazumijevaju procjenu rizika od značajnih neusklađenosti sa zakonima i propisima koji regulišu poslovanje subjekta revizije. Također, naša odgovornost podrazumijeva i ocjenu finansijskog upravljanja, funkcije interne revizije i sistema internih kontrola.

Sarajevo, 13.5.2026. godine

GENERALNI REVIZOR

Hrvoje Tvrtković, v. r.

**ZAMJENIK
GENERALNOG REVIZORA**

Nedžad Hajtić, v. r.

**ZAMJENICA
GENERALNOG REVIZORA**

Neda Močević

II REZIME PREPORUKA DATIH ZA 2025. GODINU

U Izvještaju o obavljenoj finansijskoj reviziji za 2025. godinu date su četiri preporuke (tri nove i jedna ponovljena⁴). Od ukupnog broja datih preporuka, jedna preporuka⁵ se odnosi na finansijske izvještaje i na usklađenost, a ostale na usklađenost.

U tabeli koja slijedi prikazan je rezime datih preporuka, dok su detaljni nalazi prezentovani po procesima u okviru pojedinačnih tačaka Izvještaja.

Tabela 1. Rezime datih preporuka za 2025. godinu

Br. prep.	Tekst preporuke	Status preporuke
1	Centar je dužan osigurati dosljednu primjenu odredbi Odluke Vijeća ministara BiH o načinu i postupku ostvarivanja prava zaposlenih u institucijama BiH na naknadu za službeno putovanje.	N
2	Potrebno je da Centar, u saradnji s Ministarstvom finansija i trezora BiH, uspostavi odgovarajući način evidentiranja projekata uz dosljednu primjenu važećih propisa.	N
3	Centar je dužan popunjavanje upražnjenih radnih mjesta državnih službenika na određeno vrijeme provoditi u skladu sa zakonskim odredbama kojima je uređeno zapošljavanje u institucijama BiH.	N
4	Centar je dužan osigurati dosljednu primjenu Zakona o državnoj službi u institucijama BiH, uz obavezno prethodno utvrđivanje ispunjenosti zakonom propisanih uslova za povratak na rad s odsustva iz državne službe.	P

Status: N-nova, P-ponovljena

III IZVJEŠTAJ O OBAVLJENOJ REVIZIJI

Ured za reviziju institucija Bosne i Hercegovine (u daljem tekstu: Ured za reviziju) obavio je finansijsku reviziju za 2025. godinu koja obuhvata reviziju finansijskih izvještaja Centra i, u vezi s istom, reviziju usklađenosti.

U Izvještaju o obavljenoj finansijskoj reviziji Centra za 2025. godinu su, pored mišljenja nezavisnog revizora i rezimea datih preporuka za 2025. godinu, prezentovani predmet i cilj revizije, korišteni kriteriji, kao i metode i postupci revizije. Također, ocijenjena je realizacija preporuka iz prethodnih izvještaja i prezentovani su detaljni revizorski nalazi i date preporuke.

1. PREDMET I CILJ REVIZIJE

Predmet revizije su finansijski izvještaji Centra za 2025. godinu i usklađenost aktivnosti, finansijskih transakcija i informacija s relevantnim zakonima i drugim propisima.

Cilj je da se izrazi mišljenje o tome jesu li finansijski izvještaji pouzdani i odražavaju li bilansi u potpunosti rezultate poslovanja. Također, cilj revizije je procijeniti primjenjuje li rukovodstvo

⁴ Nerealizovana preporuka iz prethodnog perioda je, nakon utvrđenog činjeničnog stanja, ponovljena.

⁵ Broj 2

institucije zakone i propise, i koristi li sredstva za odgovarajuće namjene, te ocijeniti finansijsko upravljanje, sistem internih kontrola i funkciju interne revizije.

S obzirom na to da se revizija obavlja ispitivanjem na bazi uzorka i da postoje inherentna ograničenja u računovodstvenom sistemu i sistemu internih kontrola, pojedina značajna pogrešna prikazivanja mogu ostati neotkrivena.

2. KRITERIJI KORIŠTENI U REVIZIJI

Revizija finansijskih izvještaja i revizija usklađenosti podrazumijevaju proces objektivnog prikupljanja i procjenjivanja dokaza, kako bi se utvrdilo jesu li predmeti revizije, tj. finansijski izvještaji, kao i aktivnosti, finansijske transakcije i informacije, usklađeni s odgovarajućim kriterijima koji su sadržani u zakonima i drugim propisima. Kriteriji predstavljaju uporedne parametre koji se koriste kako bi se dala ocjena predmeta revizije.

Naime, za obavljanje finansijske revizije korišteni su sljedeći kriteriji:

- Zakon o budžetu institucija BiH i međunarodnih obaveza BiH za 2025. godinu
- Zakon o finansiranju institucija BiH
 - Pravilnik o računovodstvu s računovodstvenim politikama i procedurama za korisnike budžeta institucija BiH
 - Pravilnik o finansijskom izvještavanju institucija BiH
 - Instrukcije o privremenom finansiranju institucija BiH za period januar – mart, april – juni, juli – septembar i oktobar – decembar 2025. godine
- Zakon o plaćama i naknadama u institucijama BiH i podzakonski akti
- Zakon o porezu na dohodak i Zakon o doprinosima (FBiH i RS)
- Zakon o javnim nabavkama i podzakonski akti
- Zakon o državnoj službi u institucijama BiH i podzakonski akti
- Zakon o radu u institucijama BiH i podzakonski akti
- Zakon o upravi i podzakonski akti
- Zakon o reviziji institucija BiH.

3. METODE I POSTUPCI REVIZIJE

Finansijska revizija je provedena u skladu s donesenim godišnjim planom u dvije faze, odnosno obavljanjem prethodne i završne revizije u periodu između oktobra 2025. godine i maja 2026. godine. U skladu s predmetom finansijske revizije i metodologijom rada Ureda za reviziju koja se bazira na Međunarodnim standardima vrhovnih revizionih institucija (ISSAI), sagledana je prezentovana dokumentacija i informacije o poslovanju Centra, utvrđena su područja rizika i ocijenjeno je funkcionisanje sistema internih kontrola po pojedinim procesima radi određivanja revizionog pristupa. Na bazi uzorka je izvršen uvid u knjigovodstvenu dokumentaciju o nastalim poslovnim događajima evidentiranim u poslovnim knjigama Centra. Ispitana je dosljednost primjene zakonskih propisa, te pravila, procedura i drugih internih akata koji su vezani za finansijsko poslovanje Centra. Obavljeni su razgovori s rukovodstvom Centra i drugim zaposlenicima u cilju pribavljanja obrazloženja odgovornih osoba u vezi s poslovnim događajima koji su bili predmetom revizije.

4. OCJENA REALIZACIJE PREPORUKA IZ PRETHODNIH IZVJEŠTAJA

U prethodnom Izvještaju o obavljenoj finansijskoj reviziji Centra Ured za reviziju je dao preporuke u cilju otklanjanja uočenih nepravilnosti, nedostataka i slabosti.

Tokom obavljanja revizije za 2025. godinu ocijenili smo da je Centar od ukupno tri prethodno date preporuke, realizovao dvije dok jednu preporuku nije realizovao.

U narednoj tabeli prikazan je pregled ocjene realizacije prethodno datih preporuka.

Tabela 2. Detaljan pregled ocjene realizacije prethodno datih preporuka

Broj prep.	Ocjena realizacije preporuke iz prethodnih izvještaja	Status
1/2024	Centar je postupio u skladu s odredbama Zakona o radu u institucijama BiH glede plaćenog odsustva te je uskladio Pravilnik o radu s navedenim zakonskim odredbama.	✓
2/2024	Centar ni u 2025. godini nije dosljedno primjenjivao zakonske odredbe kojim se reguliše odsustvo iz državne službe po sili zakona i povratak sa istog.	✗
3/2024	Centar u 2025. godini nije vršio angažman osoba na osnovu ugovora o djelu iz djelokruga rada institucije.	✓

Status: ✓ realizovana preporuka⁶, ✗ nerealizovana preporuka⁷

5. NADLEŽNOST, ORGANIZACIJA I RUKOVOĐENJE

Centar je osnovan na osnovu Okvirnog zakona o visokom obrazovanju u Bosni i Hercegovini⁸, kao samostalna upravna organizacija. Odlukom Vijeća ministara BiH⁹ utvrđen je početak rada Centra sa sjedištem u Mostaru pri čemu je njegov rad definisan kao nezavisan i javan.

U skladu s Okvirnim zakonom o visokom obrazovanju u Bosni i Hercegovini i Lisabonskom konvencijom (Konvencija o priznavanju diploma u visokom obrazovanju), Centar je nadležan za informiranje i priznavanje dokumenata u oblasti visokog obrazovanja, pružanje informacija i mišljenja o stranim kvalifikacijama te davanje preporuka nadležnim organima u vezi s priznavanjem diploma radi zapošljavanja, nastavka obrazovanja i ostvarivanja drugih prava.

Rad Centra uređen je Statutom Centra¹⁰ na koji je Vijeće ministara BiH dalo saglasnost 29.8.2018. godine. Centrom upravlja i rukovodi Upravni odbor i direktor.

Upravni odbor čini sedam članova: po dva iz svakog konstitutivnog naroda i jedan iz reda nacionalnih manjina. Imenuje ih Vijeće ministara BiH nakon provedenog javnog konkursa koji provodi Ministarstvo civilnih poslova BiH, uz poštovanje pariteta. Mandat članova traje tri godine, uz mogućnost reizbora. Odbor ima predsjednika, dva potpredsjednika i četiri člana.

⁶ Realizovane su aktivnosti navedene u preporuci.

⁷ Nisu preduzimane aktivnosti na realizaciji preporuke te je stoga u ovom izvještaju ponovljena preporuka za predmetni proces.

⁸ Službeni glasnik BiH, broj 59/07 i 59/09

⁹ Službeni glasnik BiH, broj 9/08

¹⁰ Službeni glasnik BiH, broj 69/18

U 2023. godini imenovana su dva člana¹¹, tokom 2024. godine imenovana su četiri člana Upravnog odbora¹², dok je jedan član iz reda ostalih imenovan 15.1.2026. godine¹³. Prema odredbama Statuta Centra¹⁴, član Upravnog odbora Centra kome je istekao mandat obavlja sve dužnosti do imenovanja novog člana Upravnog odbora.

Tokom 2025. godine Centrom je rukovodio direktor imenovan 25.1.2022. godine. Nakon provedenog javnog konkursa, Upravni odbor je 23.2.2026. godine imenovao direktora Centra na mandat od četiri godine¹⁵. Radi se o ponovljenom mandatu.

Pravilnikom o unutrašnjoj organizaciji i sistematizaciji Centra iz 2018. godine¹⁶ uređen je način rada i rukovođenja centrom te opis radnih mjesta državnih službenika i zaposlenika. Pravilnikom su sistematizovana radna mjesta za 27 izvršilaca. Na 31.12.2025. godine popunjeno je 17 radnih mjesta.

6. SISTEM INTERNIH KONTROLA

Centar je odgovoran za kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja i usklađenost poslovanja sa zakonima i drugim propisima.

Finansijsko upravljanje i kontrola:

Zakon o finansiranju institucija BiH¹⁷ uređuje područje finansijskog upravljanja i kontrole. Ovim zakonom, finansijsko upravljanje i kontrola definisano je kao sveobuhvatan sistem politika, procedura i aktivnosti koji uspostavlja i za koji je odgovoran rukovodilac institucije. Sistem finansijskog upravljanja i kontrole zasniva se na upravljanju rizicima i pruža razumno uvjeravanje da će ciljevi institucije biti ostvareni na pravilan, ekonomičan, efikasan i efektivan način.

Centar je donio osnovne dokumente za uspostavljanje sistema finansijskog upravljanja i kontrole u skladu sa Zakonom o finansiranju institucija BiH, Priručnikom za finansijsko upravljanje i kontrolu i Smjernicama za provođenje procesa upravljanja rizicima u institucijama BiH. Sačinjen je godišnji akcioni plan strategije razvoja sistema internih kontrola za 2025. godinu kojim su predviđene aktivnosti usmjerene na jačanje upravljanja rizicima i unapređenje kontrolnog okruženja. U tom kontekstu, donošenje novog pravilnika o radu Centra predstavlja ključnu aktivnost u dijelu unapređenja kontrolnog okruženja, s obzirom na to da su istim jasno definisana prava, obaveze i odgovornosti zaposlenih, kao i organizacija rada, što direktno doprinosi smanjenju operativnih rizika i jačanju interne kontrole.

U septembru 2025. godine načinjen je izvještaj o aktivnostima vezanim za upravljanje rizicima i isti dostavljen rukovodstvu Centra.

¹¹ Službeni glasnik BiH, broj 84/23

¹² Službeni glasnik BiH, broj 7/24 i 14/24

¹³ Službeni glasnik BiH, broj 8/26

¹⁴ Član 12 stav (4) Statuta, Službeni glasnik BiH, broj 69/18

¹⁵ Službeni glasnik BiH, broj 18/26

¹⁶ Akt broj 04-02-1-523-46/14 od 10.12.2018. godine

¹⁷ Službeni glasnik BiH, broj 61/04, 49/09, 42/12, 87/12, 32/13, 38/22 i 44/25

Centar je Centralnoj harmonizacijskoj jedinici Ministarstva finansija i trezora BiH¹⁸ dostavio Godišnji izvještaj o sistemu finansijskog upravljanja i kontrole za 2025. godinu.

7. FINANSIJSKI IZVJEŠTAJI

Centar je sačinio Godišnji finansijski izvještaj za 2025. godinu i dostavio ga nadležnim organima i institucijama u skladu s važećim propisima i u utvrđenom roku.

Analizom bilješki uz finansijske izvještaje konstatovano je da su sačinjeni prema Pravilniku o finansijskom izvještavanju institucija BiH¹⁹.

7.1. Pregled prihoda i primitaka

Ukupno ostvareni prihodi i primici po ekonomskim kategorijama, u periodu od 1.1. do 31.12.2025. godine, iskazani su u iznosu od 115.694 KM i odnose se na primljene donacije za realizaciju projekata u skladu s potpisanim ugovorima²⁰ (106.550 KM) i prihod od naplate premije osiguranja (9.144 KM).

Pregled prihoda i primitaka prikazan je u Prilogu I Izvještaja.

7.2. Pregled rashoda i izdataka iz budžeta

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2025. godinu²¹, Centru su odobrena sredstva u ukupnom iznosu od 1.133.000 KM (tekući izdaci 1.127.000 KM i kapitalni izdaci 6.000 KM)²². Također, spomenutim zakonom je odobreno 19 zaposlenih u Centru.

Tokom godine izvršena su usklađivanja budžeta koja se odnose na sljedeće:

- sredstva novčanih donacija prenesena iz prethodnog perioda u iznosu od 28.228 KM i uplaćena u tekućoj godini u iznosu od 106.550 KM;
- sredstva odobrena iz tekuće rezerve u iznosu od 28.660 KM za isplatu jednokratne novčane pomoći zaposlenim u institucijama Bosne i Hercegovine po Odluci Vijeća ministara BiH²³.

¹⁸ Navedena jedinica ima obavezu sačinjavati i Vijeću ministara BiH dostavljati konsolidovani godišnji izvještaj o sistemu finansijskog upravljanja i kontrole u institucijama BiH koji sadrži informacije o stepenu uspostavljanja, napretku, stanju i aktivnostima koje su u izvještajnom periodu realizovane u području razvoja sistema internih finansijskih kontrola, kao i o planovima za budući razvoj sistema internih finansijskih kontrola u institucijama BiH.

¹⁹ Službeni glasnik BiH, broj 14/26

²⁰ Najznačajnije uplate se odnose na sljedeće projekte: MOQAR – Mapiranje visokoškolskih kvalifikacija u svrhu automatskog priznavanja u regiji (15.946 KM); SUPPORT-AR -Podrška automatskom priznavanju kvalifikacija u visokoškolskim ustanovama (19.706 KM); APEL-WB - Akreditacija prethodnog iskustvenog učenja i izgradnja institucionalnih kapaciteta na Zapadnom Balkanu (56.609 KM); ARAQUA-2 - Put ka automatskom priznavanju u visokom obrazovanju i pristupu kvalifikacijama (14.011 KM)

²¹ Službeni glasnik BiH, broj 70/25

²² Do usvajanja budžeta za 2025. godinu, Centar je raspolagao sredstvima odobrenim prema pojedinačnim instrukcijama o privremenom finansiranju institucija BiH za period januar – mart 2024. godine, broj: 05-16-2-7582-1/24 od 17.12.2024. godine, za period april – juni 2025. godine, broj: 05-02-2-2225-1/25 od 24.3.2025. godine, period juli – septembar 2025. godine, broj: 05-02-2-4036-1/25 od 20.6.2025. godine i period oktobar – decembar, broj: 05-02-2-5606-1/25 od 24.9.2025. godine koje je donio ministar finansija i trezora Bosne i Hercegovine.

²³ Službeni glasnik BiH, broj 72/25

Prema navedenom, Centar je u 2025. godini raspolagao sredstvima u ukupnom iznosu od 1.296.438 KM.

Centar je izvršio prestrukturisanje rashoda budžeta koje je odobrilo Ministarstvo finansija i trezora BiH. Prestrukturisanje rashoda je izvršeno u ukupnom iznosu od 2.000 KM.

U pregledu rashoda i izdataka po ekonomskim kategorijama – zbirno, u periodu od 1.1. do 31.12.2025. godine, ukupno ostvareni rashodi iskazani su u iznosu od 1.061.427 KM, što je za 235.011 KM manje u odnosu na raspoloživi (korigovani) budžet za 2025. godinu.

Vrijednosno značajni rashodi odnose se na: bruto plaće (704.781 KM)²⁴, naknade troškova zaposlenih (128.526 KM), putne troškove (24.139 KM), ugovorene usluge (96.599 KM) i novčane donacije (50.082 KM). Najznačajniji rashodi u okviru ugovorenih usluga odnose se na isplaćene bruto naknade članovima Upravnog odbora Centra (66.547 KM).

Pregled rashoda i izdataka iz budžeta prikazan je u Prilogu II Izvještaja.

U daljem tekstu navodimo nalaze revizije.

7.2.1. Putni troškovi

Izdaci za putne troškove sa 31.12.2025. godine iznose 24.139 KM i u odnosu na prethodnu godinu veći su za 7.275 KM (neposredna potrošnja). Od navedenog iznosa, na troškove službenih putovanja u inostranstvu se odnosi 16.115 KM, a u zemlji 8.024 KM.

Uvidom u određen broj putnih naloga utvrdili smo da se u pojedinim slučajevima priznavanje troškova dnevnica za službena putovanja u inostranstvo nije vršilo u skladu s Odlukom o načinu i postupku ostvarivanja prava zaposlenih u institucijama Bosne i Hercegovine na naknadu za službeno putovanje²⁵. Naime, u slučajevima kada je kao prijevozno sredstvo korišten avion, obračun dnevnica nije vršen za period od polaska do dolaska aviona u Bosnu i Hercegovinu, već od vremena početka putovanja.

PREPORUKA 1

Centar je dužan osigurati dosljednu primjenu odredbi Odluke Vijeća ministara BiH o načinu i postupku ostvarivanja prava zaposlenih u institucijama BiH na naknadu za službeno putovanje.

Također je uočeno da je zaposlenima isplaćeno 30% iznosa propisane strane dnevnice i u slučajevima kada je organizator događaja snosio troškove dnevnica²⁶. Centar navedeno postupanje zasniva na tumačenju Ministarstva finansija i trezora BiH, prema kojem zaposleni ima pravo na 30% pripadajuće dnevnice u slučaju kada organizator putovanja plaća troškove ishrane – bilo u novcu, bilo kroz osiguranu ishranu (najmanje dva obroka).

Smatramo, međutim, da Ministarstvo finansija i trezora BiH nije uzelo u obzir činjenicu da isplata dnevnica iz dva izvora po istom osnovu nije prihvatljiva. Napominjemo i da podzakonskim

²⁴ Prosječan broj zaposlenih u 2025. godini za koje su isplaćene bruto plaće bio je 17.

²⁵ Službeni glasnik BiH, broj 6/12, 10/18 i 75/18

²⁶ Agendama ili pozivnim pismima definisano da učesnici imaju pravo na dnevnice (daily allowances) koje osigurava organizator događaja.

aktom nije definisan način obračuna i isplate dnevnica u slučajevima kada troškove dnevnica u potpunosti pokriva organizator događaja na koji zaposleni putuje.

7.2.2. Novčane donacije

Centar je u 2025. godini raspolagao donatorskim sredstvima za realizaciju osam projekata, u ukupnom iznosu od 134.778 KM. Navedeni iznos obuhvata prenesena sredstva iz prethodnog perioda u visini od 28.228 KM, kao i uplatu sredstava u tekućoj godini u iznosu od 106.550 KM. Ukupno izvršenje rashoda po projektima iznosi 50.082 KM. Preostala, neutrošena sredstva na 31.12.2025. godine iznose 84.696 KM²⁷.

Značajni rashodi iskazani u okviru donatorskih projekata odnose se na: bruto plaće i naknade (19.301 KM), putne troškove (21.620 KM) i usluge štampe i reprezentacije (6.758 KM).

Kod većine projekata je definisano da donator uplaćuje 70–80% sredstava na početku realizacije projekta, dok se preostali iznos uplaćuje po završetku projekta i prihvatanju završnog izvještaja o realizaciji projektnih aktivnosti od strane donatora.

Zbog primijenjenog modela finansiranja, Centar dio projektnih izdataka privremeno evidentira na teret budžeta (fond 10). Ukoliko konačna tranša donatora do kraja godine nije uplaćena, navedeni izdaci se storniraju i evidentiraju na prijelazni račun potraživanja. Taj račun se zatvara u narednoj godini po uplati preostalog dijela sredstava od strane donatora. Nakon što sredstva u narednoj godini postanu raspoloživa, izvršena knjiženja se storniraju i prenose na rashode projekta (fond 30).

Navedenim postupanjem rashodi nastali u tekućoj godini djelimično se priznaju u narednom obračunskom periodu, što utiče na tačnost periodičnog finansijskog izvještavanja i nedosljednu primjenu modifikovanog računovodstvenog principa nastanka događaja. Naime, članom 14. Pravilnika o računovodstvu s računovodstvenim politikama i procedurama za korisnike budžeta institucija BiH²⁸ koji se primjenjuje od fiskalne 2025. godine propisano je da se u skladu s članom 2. i 19. Zakona o finansiranju institucija BiH, prihodi i primici, rashodi i izdaci iskazuju uz primjenu modifikovanog računovodstvenog principa nastanka događaja. Navedeno znači da se prihodi priznaju u izvještajnom periodu u kojem su postali raspoloživi i mjerljivi, a rashodi na osnovu nastanka poslovnog događaja (obaveza) i u izvještajnom periodu na koji se odnose nezavisno od plaćanja.

Centar, dakle, u određenim slučajevima priznaje potraživanja na osnovu donatorskih sredstava prije nego što su ispunjeni svi uslovi za refundaciju, odnosno prije formalnog prihvatanja izvještaja o realizaciji projektnih aktivnosti od strane donatora. Navedeno postupanje podrazumijeva pretpostavku da će donator prihvatiti izvještaj i izvršiti refundaciju sredstava. Postoji rizik da donator ne prihvati izvještaj ili ne prizna određene troškove, što može rezultovati neutemeljeno iskazanim potraživanjima i priznavanjem troškova na teret budžeta uslijed izostanka očekivanog priliva sredstava.

Uvidom u podatke iskazane na prijelaznom računu potraživanja i u vezi s tim iskazane rashode konstatovano je da je u 2025. godini Centar zatvorio potraživanja u iznosu od 15.931 KM na

²⁷ Neutrošena sredstva se odnose na sedam projekata od kojih su najznačajniji: ARAQUA2 (11.687 KM), SUPPORT-AR (17.963 KM) i APEL-WB (54.004 KM).

²⁸ Akt Ministarstva finansija i trezora BiH od 26.12.2025. godine

prijelaznom računu potraživanja na osnovu uplate po projektu MOQAR²⁹ te istovremeno iskazao rashode na kontu 611100 – Bruto plaće i naknade iznos od 10.175 KM i na kontu 613900 – Ugovorene usluge iznos od 5.756 KM.

Također je iznos od 2.911 KM na projektu SMEQA zbog neraspoloživosti sredstava projekta isplaćen iz sredstava budžeta Centra i evidentiran kao potraživanje uz planirano zatvaranje po uplati donatora u 2026. godini.

PREPORUKA 2

Potrebno je da Centar u saradnji s Ministarstvom finansija i trezora BiH uspostavi odgovarajući način evidentiranja projekata uz dosljednu primjenu važećih propisa.

7.3. Bilans stanja

U bilansu stanja na 31.12.2025. godine iskazana su ukupna sredstva u iznosu od 86.724 KM. Ukupne obaveze s izvorima sredstava iskazane su u iznosu od 180.692 KM.

Značajne stavke bilansa stanja odnose se na neotpisanu vrijednost stalnih sredstava (83.421 KM), kratkoročne tekuće obaveze (27.194 KM) i obaveze prema zaposlenima (70.077 KM).

Bilans stanja prikazan je u Prilogu III Izvještaja.

8. ZAPOSŁJAVANJE I STATUS ZAPOSLENIH (ANGAŽOVANIH) OSOBA

8.1. Zapošljavanje na određeno vrijeme

Zakonom o državnoj službi u institucijama BiH³⁰, članom 28a, definisano je da ako u instituciji postoji upražnjeno radno mjesto državnog službenika koje je u skladu s potrebama rada neophodno hitno popuniti, a interna popuna radnog mjesta nije moguća, institucija može to radno mjesto popuniti zapošljavanjem osoba u skladu sa Zakonom o radu u institucijama Bosne i Hercegovine u statusu zaposlenika, uz prethodno pribavljenu saglasnost Agencije za državnu službu BiH. Zakonom o radu u institucijama BiH³¹ je omogućen prijem u radni odnos zaposlenika na određeno vrijeme do tri mjeseca bez raspisivanja javnog oglasa, kada zbog hitnosti obavljanja posla, iznenadnog povećanja obima posla ili iznenadnog odsustva zaposlenika nije moguće pravovremeno provesti javni oglas.

Centar je u 2025. godini s jednom osobom za poslove radnog mjesta državnog službenika zaključio dva ugovora o radu na određeno vrijeme na period od po tri mjeseca. Navedeni ugovori su zaključeni bez prekida radnog odnosa između ugovora i bez raspisivanja javnog oglasa. Agencija za državnu službu BiH je u predmetnom postupku dala saglasnost za zaključivanje ugovora o radu na određeno vrijeme na period do tri mjeseca.

²⁹ Projekt je trajao od februara do novembra 2024. godine. Na početku projekta u 2024. godini donator je uplatio 78.827 KM, a sljedeća uplata u iznosu od 15.946 KM izvršena je u 2025. godini po prihvatanju završnog izvještaja o projektu.

³⁰ Službeni glasnik BiH, broj 19/02, 35/03, 4/04, 17/04, 26/04, 37/04, 48/05, 2/06, 32/07, 43/09, 8/10, 40/12, 93/17 i 18/24

³¹ Službeni glasnik BiH, broj 26/04, 7/05, 48/05, 50/08, 60/10 32/13, 93/17 i 59/22

Smatramo da Centar nije postupio u skladu s odredbama naprijed navedenih propisa, budući da je izvršio zapošljavanje na radno mjesto državnog službenika na određeno vrijeme u trajanju dužem od tri mjeseca bez raspisivanja javnog oglasa.

PREPORUKA 3

Centar je dužan popunjavanje upražnjenih radnih mjesta državnih službenika na određeno vrijeme provoditi u skladu sa zakonskim odredbama kojima je uređeno zapošljavanje u institucijama BiH.

8.2. Povratak s odsustva iz državne službe

Postupcima revizije utvrđene su nepravilnosti u primjeni odredbi Zakona o državnoj službi u institucijama BiH koje se odnose na nespojivost dužnosti i odsustva na osnovu kandidature na izborima.

Naime, državna službenica (stručna saradnica), u augustu 2024. godine ostvarila je pravo na odsustvo iz državne službe na osnovu potvrđene kandidature na izborima, a u skladu s članom 16. stav 1. tačka c) Zakona. Navedenom odredbom propisano je da se državni službenik smatra na odsustvu iz državne službe od trenutka potvrde kandidature za javnu funkciju na koju se bira direktno ili indirektno, odnosno od trenutka imenovanja na položaj u zakonodavnom ili izvršnom organu na bilo kojem nivou vlasti u Bosni i Hercegovini.

Državna službenica je potom 31.12.2024. godine podnijela zahtjev za povratak na rad, navodeći da su ispunjeni uslovi za prekid odsustva iz državne službe. Postupajući po navedenom zahtjevu, Centar je rješenjem direktora od 3.1.2025. godine odobrio njen povratak u državnu službu, sa početkom rada od 6.1.2025. godine. Međutim, relevantnim zakonskim odredbama propisano je da se državni službenik može vratiti na isto ili slično radno mjesto isključivo u slučaju neuspjeha na izborima ili nakon prestanka mandata. Iz navedenog proizlazi obaveza poslodavca da prije donošenja odluke o povratku utvrdi postojanje jednog od zakonom propisanih osnova odnosno da osigura da je postupanje zasnovano na odgovarajućim zakonskim odredbama.

Iz prezentovane dokumentacije ne može se zaključiti da je poslodavac izvršio provjeru ispunjenosti zakonskih uslova za povratak službenice na rad. Također, na osnovu javno dostupnih službenih podataka utvrđeno je da je državna službenica izabrana u predstavnički organ za koji se kandidirala i obavlja tu funkciju, što dodatno ukazuje da nisu bili ispunjeni uslovi za njen povratak u državnu službu. Odluka o povratku je zasnovana isključivo na zahtjevu službenice, bez dokaza da je utvrđeno postojanje nekog od propisanih osnova iz člana 16. stav 1. tačka d) Zakona. Rješenjem Agencije za državnu službu BiH od 27.5.2025. godine navedena osoba razriješena je dužnosti državnog službenika u Centru.

PREPORUKA 4

Centar je dužan osigurati dosljednu primjenu Zakona o državnoj službi u institucijama BiH, uz obavezno prethodno utvrđivanje ispunjenosti zakonom propisanih uslova za povratak na rad s odsustva iz državne službe.

9. JAVNE NABAVKE

Centar je donio i objavio Plan javnih nabavki za 2025. godinu, kako je propisano Zakonom o javnim nabavkama³².

Prema prezentovanim podacima³³, Centar je u 2025. godini putem direktnog sporazuma izvršio nabavke u vrijednosti od 59.675 KM. Putem Aneksa II provedena su tri postupka u vrijednosti od 20.369 KM.

U revidiranim postupcima javnih nabavki nisu uočeni značajni nedostaci.

³² Službeni glasnik BiH, broj 39/14, 59/22 i 50/24

³³ Podaci iz sistema e-nabavka (iznosi bez PDV-a)

10. KOMENTARI CENTRA NA NACRT IZVJEŠTAJA

Centar je u ostavljenom roku dostavio komentare na Nacrt izvještaja o obavljenoj finansijskoj reviziji za 2025. godinu. U komentarima je dat osvrt na nalaze i preporuke revizije koje se odnose na putne troškove, novčane donacije, zapošljavanje na određeno vrijeme i povratak odsustva iz državne službe (tačke 7.2.1., 7.2.2., 8.1. i 8.2. Izvještaja). Komentari Centra koji se odnose na putne troškove, novčane donacije i zapošljavanje na određeno vrijeme nisu prihvaćeni, jer nisu dostavljeni novi dokazi i činjenice koje bi uticale na izmjenu nalaza i preporuka iz Nacrta izvještaja.

Komentar koji se odnosi na povratak s odsustva iz državne službe djelimično je prihvaćen te je konačan izvještaj dopunjen informacijom da je državnoj službenici prestao radni odnos 27.5.2025. godine, u skladu s rješenjem Agencije za državnu službu BiH. Navedeno nije uticalo na izmjenu utvrđenog nalaza i date preporuke.

Detaljno pojašnjenje komentara dato je u odgovoru na dostavljene komentare na Nacrt izvještaja o obavljenoj reviziji, koji je dostavljen rukovodstvu Centra uz konačan izvještaj o obavljenoj finansijskoj reviziji za 2025. godinu.

Reviziju u Centru za 2025. godinu obavili su: Ivana Jurčević – vođa tima, Aida Selimović – član tima i Marko Sikima – član tima.

**Vođa tima za
finansijsku reviziju**

Ivana Jurčević, v. r.

**Rukovodilac Odjela za
finansijsku reviziju**

mr. sc. Fatima Mehanović, v. r.

Broj: 05-16-1-653/26

Prilozi

Prilog I – Pregled prihoda i primitaka za 2025. godinu

Prilog II – Pregled rashoda budžeta za 2025. godinu

Prilog III – Bilans stanja na 31.12.2025. godine

Pregled prihoda i primitaka za 2025. godinu

Centar za informiranje i priznavanje dokumenata iz oblasti visokog obrazovanja

Opis	Planirani iznos u budžetu	Izmjene i dopune	Ukupni planirani iznos	Ostvareni iznos	Procentat (5/4*100)
1	2	3	4 (2+3)	5	6
1. Neporezni prihodi	0	0	0	9.144	
Prihodi od preduzetničkih aktivnosti i imovine i prihodi od pozitivnih kursnih razlika	0	0	0	0	
Naknade i takse i prihodi od pružanja javnih usluga	0	0	0	9.144	
Novčane kazne (neporezne prirode)	0	0	0	0	
2. Tekući transferi i donacije	0	0	0	106.550	
Primljeni tekući transferi od stranih vlada i međunarodnih organizacija – donacije iz inostranstva	0	0	0	106.550	
Primljeni tekući transferi od ostalih nivoa vlasti	0	0	0	0	
Domaće donacije	0	0	0	0	
3. Kapitalni primici	0	0	0	0	
Kapitalni primici od prodaje stalnih sredstava	0	0	0	0	
Primici od finansijske imovine	0	0	0	0	
Primici od dugoročnog zaduživanja	0	0	0	0	
Primici od kratkoročnog zaduživanja	0	0	0	0	
4. Ukupni prihodi i primici (1+2+3)	0	0	0	115.694	

Pregled rashoda budžeta za 2025. godinu

Centar za informiranje i priznavanje dokumenata iz oblasti visokog obrazovanja

Opis	Odobreni budžet	Usklađivanja budžeta	Ukupni budžet	Izvršenje budžeta	Procenat (5/4*100)
1	2	3	4 (2+3)	5	6
1. Tekući izdaci	1.127.000	28.660	1.155.660	1.005.369	87
Bruto plaće i naknade	813.000	-2.000	811.000	704.781	87
Naknade troškova zaposlenih	121.000	28.660	149.660	128.526	86
Putni troškovi	28.000	0	28.000	24.139	86
Izdaci telefonskih i poštanskih usluga	14.000	0	14.000	9.412	67
Izdaci za energiju i komunalne usluge	0	0	0	0	
Nabavka materijala	12.000	0	12.000	7.734	64
Izdaci za usl. prijevoza i goriva	15.000	0	15.000	10.596	71
Unajmljivanje imovine i opreme	6.000	1.000	7.000	6.109	87
Izdaci za tekuće održavanje	15.000	1.000	16.000	14.486	91
Izdaci za osiguranje	4.000	0	4.000	2.986	75
Ugovorene i druge posebne usluge	99.000	0	99.000	96.599	98

2. Kapitalni izdaci	6.000	0	6.000	5.976	100
Nabavka opreme	6.000	0	6.000	5.976	100

3. Tekući grantovi	0	0	0	0	
	0	0	0	0	
4. Budžet-neposredna potrošnja(1+2+3)	1.133.000	28.660	1.161.660	1.011.345	87

5. Višegodišnja kapitalna ulaganja	0	0	0	0	
	0	0	0	0	

6. Novčane donacije	0	134.778	134.778	50.082	37
Razvoj vanrednih i studija kratkog ciklusa na visokoškolskim ustanovama u BiH (PARTISH)	0	322	322	240	75
Internetska dostupnost studijskih programa i baze podataka radi transparentnosti priznavanja (OCTRA)	0	743	743	0	0
Internetska dostupnost studijskih programa i baze podataka radi transparentnosti priznavanja 2 (OCTRA 2)	0	2.240	2.240	2.237	100
Mapiranje visokoškolskih kvalifikacija u svrhu automatskog priznavanja u regiji (MOQAR)	0	15.946	15.946	15.946	100
Jačanje kapaciteta i mehanizama za poboljšanje sistema sigurnosti kvaliteta u visokom obrazovanju u Bosni i Hercegovini (SMEQA)	0	25.201	25.201	24.987	99
Put ka automatskom priznavanju u visokom obrazovanju i pristupu kvalifikacijama (ARAQUA-2)	0	14.011	14.011	2.324	17
Podrška automatskom priznavanju kvalifikacija u visokoškolskim ustanovama (SUPPORRT-AR)	0	19.706	19.706	1.743	9

Akreditacija prethodnog iskustvenog učenja i izgradnja institucionalnih kapaciteta na Zapadnom Balkanu (APEL-WB)	0	56.609	56.609	2.605	5
--	---	--------	--------	-------	---

7. Programi posebne namjene	0	0	0	0	
	0	0	0	0	

8. Ukupno (4+5+6+7)	1.133.000	163.438	1.296.438	1.061.427	82
----------------------------	------------------	----------------	------------------	------------------	-----------

Bilans stanja na 31.12.2025. godine

Centar za informiranje i priznavanje dokumenata iz oblasti visokog obrazovanja

Opis	31.12.2025.	31.12.2024.	Procenat (2/3*100)
1	2	3	4
1. Gotovina, krat. potraživanja, razgraničenja i zalihe	3.303	18.686	18
Novčana sredstva	0	0	
Kratkoročna potraživanja	3.303	18.686	18
Kratkoročni plasmani	0	0	
Interni finansijski odnosi	0	0	
Zalihe	0	0	
Kratkoročna razgraničenja	0	0	
2. Stalna sredstva	83.421	97.359	86
Stalna sredstva	323.788	322.756	100
Ispravka vrijednosti	240.368	225.397	107
Neotpisana vrijednost stalnih sredstava	83.421	97.359	86
Dugoročni plasmani	0	0	
Dugoročna razgraničenja	0	0	
UKUPNO AKTIVA (1+2)	86.724	116.045	75
3. Kratkoročne obaveze i razgraničenja	97.271	104.695	93
Kratkoročne tekuće obaveze	27.194	39.434	69
Kratkoročni krediti i zajmovi	0	0	
Obaveze prema zaposlenima	70.077	61.816	113
Interni finansijski odnosi	0	0	
Kratkoročna razgraničenja	0	3.445	0
4. Dugoročne obaveze i razgraničenja	0	0	
Dugoročni krediti i zajmovi	0	0	
Ostale dugoročne obaveze	0	0	
Dugoročna razgraničenja	0	0	
5. Izvori sredstava	83.421	97.359	86
Izvori sredstava	83.421	97.359	86
Ostali izvori sredstava	0	0	
Neraspoređeni višak prihoda/rashoda	0	0	
UKUPNO PASIVA (3+4+5)	180.692	202.054	89

Napomena: Pravilnikom o finansijskom izvještavanju institucija Bosne i Hercegovine, čl.10. stav 4., napomenuto je da bilans stanja budžetskih korisnika **neće biti uravnotežen** (aktiva jednaka pasivi) zbog programski uspostavljenog sistema Glavne knjige, dok će bilans stanja koji radi Ministarstvo finansija i trezora na nivou Budžeta institucija Bosne i Hercegovine za tekuću godinu biti uravnotežen.